

不借出
民國二十年

第十一卷

帝





西村集序

莊周有言曰刻意尚行離世異俗高論怨誑爲亢而已矣此山谷之士非世之人枯槁赴淵者之所好也語大功立大名禮君臣正上下爲治而已矣此朝廷之士尊主彊國致功并兼者之所好也夫仁義忠信以爲學出則朝廷處則山谷人徒以爲爲亢也以爲爲治也而不知亢之未始不爲治治之未始不爲亢也故曰夫人幼而學之壯而欲行之行則君子欲之然能必其行乎哉欲之而不可得則其學猶是也是故亢而不爲倍治而不爲矜則固世之所謂通儒者已西村先生自少好學

於書無所不讀卓然舉大義不掇拾以爲文辭而尤攻於史學於古今治亂之端官府政事名物數紀縱橫上下指掌論說莫不有肯綮歸宿以爲學者宜如是而不屑以求一試聲名隱然起東南成化中三原王公巡撫江南以百姓之利病坐先生而問焉則歷歷語所以退復疏其事以道諸所宜更置公嘆曰子之才可當一面乃今得先生所著述自詩歌文辭之外其與旬宣大臣臺部諸使郡縣長吏往復論白及於政事者居其三之一焉莫不適當變盡利害里閭羣布之所推遜而無有選擇縉紳大夫之所以嚮用致理而不能舍去者皆是

也則所謂通儒者非先生歟吾吳中經生學士講求時務水利莫先焉決塞變遷大要委諸海而已殆難按迹而求復其舊也職方禹貢以來互爲援據夫人而能之舉而加諸水則悖矣不然則又吏於茲土者大發在官之蓋藏而以畚鍤從事壞廬舍弊腴掘地數十里引旁流內其中而曰水去矣明年不幸而恒雨曾不能損水之分寸其如浮而不實費而無功何哉至讀先生論水利書首以謹隄防其大法有司者使田者因地執豫爲防以擬水於是立之表以程其功謀之藝以益其厚貸之粟以傅其力夫民水也大爲之坊民猶踰之况不

爲之坊乎裕民成賦之道未有能行之者其有用之學
可以盡一而論也余生也晚不獲操几杖以從讀其書
而每有感焉先生既歿其冢孫進士臣哀其稿爲集余
曰是集也約而達勤而節謀而有徵不獨論水利若是
矣可以傳也余所嘗欲見先生所著禮纂若干卷尚不
在集中先生史氏諱鑑字明古吳江人學者稱西村先
生吳文定公表其墓家世行實具可攷也
賜進士第太子太保吏部尚書邑人周用白川氏撰

西村集序

余少有志古文詞家無藏書聞之吾鄉長老云吳興有
張淵先生長洲有沈周先生吾吳有杜璠先生吳江有
史鑑先生其所論著皆可法也乃日夜求諸先生之作
獲一篇輒口誦而手抄之然皆未覩其全而史先生者
不苟出積日月莫能多得旣而復求諸先生爲人皆淵
潛泥蟠冥搜玄覽而又守禮謹度純王之民也於時名
公卿之在朝野與有事其地者若前武功伯天全徐公
禮部尚書文定吳公吏部尚書端毅王公皆爲布衣交
上下其論商確古今區畫利害而沈史兩先生名在公

卿問尤赫然者諸先生既歿三四十一年間遂不復聞隱君子之作夫豈聲跡俱晦抑偶無其人耶而諸先生之作猶播在人口嘉靖癸未春史先生之孫臣與余同舉進士進士之子璧通家往來因請史先生之作凡昔所未覩者悉檢以授有若夜光明月賈人知其至寶求之弗得而一旦盡得之蓋有不勝其喜者乃日夜讀讀其賦其辭弘演而不至於淫體斯備矣讀其古詩其詞贍而不厭其雋永者乎讀諸近體其詞峻而整約而達出乎聲比之外者也讀其序數引旁達秩秩如也章章如也讀其記詞覈而事舉謂之善志讀其銘墓之詞實錄

而不近於諛其生者以慰而死者無遺憾乎讀其雜著其體殊其詞班班乎可觀商彝漢鼎其欵識要自有別也及讀其水利議郡政書誅巫之文革姦之對則嘆曰繁非詞人之詞也慷慨憤世懼俗敝而上弗恤政缺而民日以病不得已而言也嗚呼有本哉世嘗謂文章家有二臺閣經世之文山林遁世之文史先生居震澤之濱耕而讀焉釣而遊焉爵祿不入於心非所謂山林之士乎然采其論著有足以經世者其於臺閣固已具之而諸名公卿固已識之矣璧將請於父以先生遺稿壽諸梓使余書其言爲序先生字明古別號西村故曰西

村集云諸體總若干卷昔嘉靖八年己丑三月上已
賜進士第兵部職方司郎中郡人盧襄師陳甫撰

西村集序

徐子讀太史公言巖穴之士趨舍有時類湮沒而不稱
未嘗不笑之也古之遯世者若焦先羸孫登嘿仲長子
光瘖甚矣哉皆無家屬絕人事並不廢身前後名夫詎
有厚實而聲湮沒者哉又讀所謂砥行立名者非附青
雲之士惡能施於後世又未嘗不笑之也夫砥行立名
者青雲之士也其附青雲之士者非青雲之士也又何
砥行立名之有蓋明興文獻之盛松陵有史明古先生
布衣抱當世之具籍甚成弘間或曰隱君子也或曰非
隱者也徐子曰先生青雲之士也其隱耶其不隱耶其

在隱不隱之間耶皆不足論品法書名畫者論佳惡不當論真贋品賢人君子者論真贋不當論隱顯隱顯者其遭遇或其趨尚殊哉雖然謂先生非隱君子不可宋進士單鏐著吳中水利書蘇長公錄進於朝方新法熾格不行鏐遂隱居不仕先生經濟才所著吳江水利議運河志其水學視單公不啻過之其上邦伯罷政利弊書上中丞時務書語語碩畫亦畧施行矣夫以先生之才當憲宗皇帝全盛之時三原王公得君以大司馬之重擁節鉞鎮江南與先生具寶主禮時先生年未五十豈不能登諸朝大用之而竟以布衣老則先生不願仕

也彼碌碌者游大人以成名名必不成詭命曰隱按先生所往還名卿才大夫踪跡皆不得已而後應叩之而鳴語不及私乃大人遊先生而非先生遊大人也故曰隱君子也先生同時有趙與哲亦受知於三原公所著僊華集或疑其言涉時事非處士所宜陸太常子餘論之曰劉勝雖清高未必賢於杜密彼隱情惜已自同寒蟬者直拘士一隅之見豈所論夫弘達君子哉余於先生亦云若必埋名滅跡世無一人知者而後曰隱是名在隱逸傳者皆非隱逸名在高士傳者皆非高士隱之名義當何從立且郭林宗布衣操教導權重於卿相將

不得名高士哉不佞非隱者也而以多病潛跡先生之
從孫曰辰伯者見訪溪山中哀先生已梓未梓集屬采
擇而序之舊有序余讀之則先生有孫曰臣登進士官
少參而余自幼知先生不知少參也先生既弗試而少
參公未究其用辰伯孝友甚好古儁才宏藻將於是焉
在雖然圭璋特達謂先生將以辰伯益重則非先生也
謂辰伯席先生重則非辰伯也雖余不妄言謂能言必
不妄言者一言之弁重則非史明古先生集也皆萬曆
三十一年癸卯春日吳邑徐應雷聲遠甫撰

西村集序

夫士之修行立節于時而湮沒無聞者何可勝紀也又
其名赫一時與當世鉅公遊而久迺湮滅者又何可勝
紀也予少側聞史明古名謂當時運方隆吳文定公以
重德名海內而蘇之士若明古及沈啟南杜用嘉張子
靜皆相與善而張之名尤晦至踪跡之不得明古之孫
曰璧者予嘗數見之然未及請今其從孫兆斗余字之
北河者每言及先世則知明古之後有人哉夫明古先
生于當時名可得聞不可得見郡邑數致禮輒避之三
原王公撫吳固名德重臣造其廬請見猶不許至再三

西林集
百才集
劉
迺見布衣抗以寶主禮詢以當世急務言皆中肯綮不
阿意以徇王公竦然敬異觀其上書論郡政利弊者八
其首曰吳賦之害長稅與輸稅者交弊於力不勝之困
舊額已定雖欲稍寬之不可而轉漕者亦不能無少豐
餼之食况卒有水旱之虞而國計所係其若之何其曰
除盜長抑兼并皆指長民者不加意于民瘼餘皆懇懇
欵欵曲爲之計而務釐安靖之方無一言不著明者故
舊籍於公稍損十之一二而下之供輸亦不敢負以匱
國家之用上下兼利其言必可施行王公尤仁德忠愛
採而上之以定邦之衡準至于今迄賴之者皆明古先

生言之力也而終不肯一應命以出固憲孝間氣化純
厚其所養育人才無有佻浮輕靡詭時譎誕以崇虛名
者且文亦皆溫麗雅正檢嚴典則其體裁若一識度弘
遠鑒覽淹該問學淵源互相師友非若今之士迺流于
學僞而博行非而辨以欺世盜名者無算也且僞則僞
矣而博不能非則非矣而辨且不逮惟以干牘遍請勢
諸名卿雖結客而置其家不惜其所爲皆魯朱家所羞
稱乃竊盜居民間者猶洋洋自衒爲人居間曰若某事
可以某當道解也而復冒處士名謂我能不干時爭進
隱遁不汙是何其爽實哉風之淪濡若此故予觀明古

先生集而深慨焉今之風雖欲挽而上之其可得乎夫
人不悅學則才雖敏給而空疎無當以此逞詞徒華蔚
藻瞻且不足言而况其淺膚能望古之藩籬乎茲集久
不易覩今北河出而鐫之以行若玉在櫝其光發聞能
竟掩乎余歎昔之晦而今當大顯于時敬爲之序沛國
監察御史劉鳳撰

西村集發凡

凡例四則

一凡古人文集必載傳述以考其生平茲取徵聘詔
隱逸傳吳文定墓表巡撫薦疏崇祀申文及弔挽詩
章冠諸帙首庶幾世之君子開卷而如見其人云
一是集舊刻數種皆非全本不無異同茲遵義維公手
葺原藁較讐次第凡見于舊刻與錢牧齋先生列朝
詩選朱竹垞先生明詩綜者無不畢備較之從前刻
本更爲完美

一抄本分二十一卷多寡不均位置多訛爲請於當湖

陸陸堂吳門李客山諸先生點閱商榷稍逸其應酬
文字詩選十之五文選十之七合併而論次之編定
八卷付諸梓人流播海內其外倣歸震川先生集例
名爲餘集藏之家塾

一編次諸本不拘茲倣朱竹垞先生曝書亭集例首賦
次詩詞次書序跋考等而以墓誌銘行狀祭文居末

十一世孫 開基 百拜謹識

西村集總目

卷首 徵聘詔 隱逸傳 墓表 薦疏

申文 挽詩

卷一 賦 辭 頌 樂府 歌行

卷二 五言古 七言古 雜言古

卷三 五言律 七言律

卷四 五言排律 七言排律 五言絕句

六言絕句 七言絕句 聯句 詩餘

卷五 書 尺牘 序

卷六 跋 考 議 贊 志 銘 對 相喻

字詞 啟傳志

卷七 記 墓表 墓碣 墓版文 誄

卷八 墓誌銘 行狀 祭文

十世孫 濂 編次

十一世孫 積厚 全校

積厚 積基 積輝 積勳

西村集卷首

徵聘詔 成化十六年八月

朕承丕緒用人圖治亦有年矣永惟勞於求賢然後成
無爲之治樂於忘勢乃能致難進之英聞爾處士沈周
史鑑沉酣經史博洽古今蘊經緯之遠猷抱君民之宏
畧顧乃遜跡邱園不求聞達朕眷懷高誼思訪嘉謨茲
特遣使徵爾赴用隱期同德出宜彙征以副朕翹企之
意

隱逸傳 載吳江縣志

史鑑字明古邑黃溪人學士仲彬之曾孫也鑑年十二

西村集卷首
三天才敏妙語卽驚人守祖訓不願仕進隱居著書吉
凶之禮動遵古法論事慷慨人莫能屈錢穀水利無不
周知世居穆溪擅園林之勝客來訪者陳彝鼎圖書古
色照耀不減顧瑛玉山草堂喜交遊持信義遊其門者
不絕性尤直諒有過必面規之成化中王恕巡撫江南
聞其名延禮之諮以政務鑑接席抗論未嘗及私恕深
器重焉吳文定公寬李太僕應禎沈布衣周皆交契倡
和甚富晚歲舉修憲廟實錄不行弘治丙辰卒年六十
三鑑于書無所不通尤長史學文章雄渙古雅卓然成
家五言詩力追晉魏所著有西村集西村雜言小雅堂

日抄禮疑禮纂凡若干卷時黎里尹寬平望曹孚練塘
凌震並敦學行與鑑爲詩酒交成弘間號四大布衣

墓表

會狀元東閣大學士
兼禮部尚書謚文定

吳寬長洲

吳江穆溪之上有隱士曰史明古其爲人足跡不出百
里之外然江澗間人知其名至於郡縣大夫亦皆禮下
之而予取以爲友蓋四十年於此矣其志正而直其言
確而厲其所爲無弗依於禮者當其壯時患閭里之人
以巫覡惑衆上書縣中欲盡除之曰此皆不容於先王
之世者不除則風俗不正禮教何由而行耶與人論事
辯說超踔坐客莫能屈至有所感奮詞氣益峻雖達官

貴人衝突不顧見依違徇情者心輒鄙之其治家辨內外定上下嚴若官府然凡吉凶之事悉違世俗而行必倣於古知禮者取之其學於書無所不讀而尤熟於史論千載事歷歷如見而剖斷必公蓋有宋劉道原之精至於時事人言得於聞見往往筆之成編則有洪容齋之博焉若其才如錢穀水利之類皆知其故使得郡縣而治之恢恢乎無難者爲文章紀事有法醇雅如漢人語詩則不屑爲近體興至吟聲唧唧冥搜苦索欲追魏晉而及之家居甚勝水竹幽茂亭館相通如入顧辟疆之園客至陳三代秦漢器物及唐宋以來書畫名品相

與鑒賞好著古衣冠曳履揮麈望之者以爲列仙之儒也間與親友吳鐵峯數人扁舟往來月爲雅集以觴詠相娛樂又嘗與劉僉憲沈石田諸公遊武林經月忘返所至爲文記之曰此未愜吾志也會當絕大江北遊中原覽岱華涉河濟循王屋廬阜而歸其思致之高如此晚歲益務清曠室無姬侍築小雅之堂方床曲几宴坐其中或累月不至城郭至卽止宿僧舍而已前二年予家居一日忽冒暑見過飲水數椀而去又二旬而疾作家人進藥俾持去曰吾治棺待盡久矣且吾年六十三又天耶竟卒弘治丙辰六月庚子也明古狀貌奇偉鬚

髯奮張平生喜交遊惟其持信義四方之士過其門者
不絕於所厚者有過尤好面折故人尤以直諒稱之少
謁武功徐公公與談史卽許其有識遂數從議論而識
益進今致仕三原王公巡撫江南時聞其名延見之詢
以政務尤許其才然未嘗言及私事公益重之且恨其
老而不用於世也其諱鑑初字未定後始字明古自號
西村人稱西村先生曾祖彬祖晟父珩母凌氏繼母朱
氏娶李氏子男二人曰永錫太學生曰永齡縣學生女
一人適鄉貢進士吳瑩孫男四人曰曾同曾繼曾遇曾
達曾同縣學生孫女二人曾孫男一人曰夢禎當明古

卒之明年予與文溫州宗儒往哭之其二子哭拜卽以
墓文請予念失此良友方切悲傷而何文之能爲耶顧
有終不得而已者乃卒之四年己未三月庚申葬於吳
縣西山之博士塢爲表之曰嗚呼世有信古執禮如斯
人者乎世有博洽好學如斯人者乎有才之達論之正
如斯人者乎亦有剛直好義高曠絕俗如斯人者乎有
如斯人當觀其終達生順命能保其躬嗚呼明古庶無
愧乎其中

薦疏

欽差巡撫南直隸地方總理糧儲兵部尚書兼都察院

右都御史臣王恕謹奏爲薦舉賢良以裨聖化以光盛
治事臣聞唐虞咨詢務存採納周文好士恒若渴飢用
能成雍和之化故臣子效忠不惟勤勞其身尤必多所
引薦以底績勸史魚不忘遽瑗鮑叔請召夷吾自昔公
篤之慮類然也臣待罪南都咨訪遺逸竊見蘇州府吳
江縣儒生史鑑天資超縱藝才標植文采英暢議論條
貫慤有端緒耳聽目覽撇見不遺墳典邱索竹素以來
無不渾誦遇所著述下筆不休義理由其手出精深博
敏沉雄藻繪詞賦可相如此肩書奏則嚴安徐樂不能
過也且烈亮有聞忠直成性雖周昌蹇諤汲黯誠直以

今方古未見其差若其經國匡俗水利錢穀慮變圖難
抗力矯志必能輯寧邦夏宣靖四方適時宜緩急陳安
攘富強之計誠文武克允貞幹負荷之器也伏願拔擢
陛下臨軒親試其可畀以方面之重必能究盡事情行
且大濟武功益隆文治三年之任而不能大有益於時
政臣當受罔上之誅無所辭避伏惟陛下垂神亮察幸
甚幸甚不勝恐懼云云

鄉賢申文

蘇州府吳江縣尹詹文光爲崇祀鄉賢闡幽德以激後進事
據儒學廩增附生員李炫梅禹錫錢乾沈瀚等呈稱沒

世不忘君子盛德之效奉嘗有紀古人尚賢之方故經重法施於民之文令著歲列於祀之典此古今通例風化攸關者本邑已故徵君先生史鑑字明古號西村自詩書衍族本忠孝傳家事繼母以孝聞待諸昆以友著超然出塵世之表卓乎具古人之風博學無窮篤行不倦年幾杖國非公事不至公門身有席珍擅儒名而廣儒業志非鴻漸羽足爲儀行不同人分甘於野治家有訓別內外而辨上下處世不流立綱紀而布經綸冠婚喪祭四端輯四禮以行古道衣冠宮室等制遵會典以合時宜廣祭田以備春秋禮嚴宗族設義塾以淑子弟

教普親疎兩朝以賢良徵上書而固辭也一邑以巫覡惑建言而盡除之內閣吳文定公寬篤以朋情取謨猷而建調元之績巡撫王端毅公恕待以賓禮藉經畫以成治水之功憲廟纂修覈而不鄙西村文集古而益浚左傳編禮經疑禮經纂明文約博古考功懋先儒運河志水利議小雅日抄武林紀事司馬年譜文開後學緝遠祖廢塚清隔府浮糧實三吳之高士誠一代之偉人鄉黨稱揚口碑尚在縉紳傳述心法猶存借使不能著行於前曷克流芳於後當時仰瞻山斗今日想見羹墻舊業遺文動如存之感流風餘韻關沒後之思驗此行

實之詳允協褒崇之典禮應申請送入鄉賢祠一體同
祀庶使德化薰蒸風聲感召足以彰顯微闡幽之意且
造移風易俗之端事關公典理合備由

登小雅堂哭故友西村史先生 吳寬

路繞黃家溪水長春風灑淚復登堂草荒求仲常來徑
塵滿元龍舊卧床分手死生嗟契濶傷心聚散覺淒涼
高邱數尺棲神地碧樹爭凋不待霜

哭史西村先生

文林

百里乘舟淚不乾堂登小雅倍辛酸高臺月上人何在
曠世風流骨未寒好古有心真自許貽謀無地不爲安

偉哉尚覺聞雄辯漫展遺文一再看

登小雅堂哭西村史姻家先生 沈周

築臺高住似神仙恰好堂成及巳年歌哭於斯人忽耳
死生無度事茫然青山底處尋藏史白雪從今付絕絃
此夜獨登惟見月清光依舊石闌前

哭西村回雪中過鶯脰湖有感再悼一章

不復見此叟歸哉空雪湖低雲接清淚遠浪激長吁
髀老博士崢嶸偉丈夫明廷虛購玉滄海實遺珠雄辯
長翻口衰痕未滿鬚斯人竟微疾我輩強孱軀一邑人
皆愕三年夢已殊妙篇留膾炙還與不亡俱

登小雅堂哭西村夫子

文璧

六十三年蓋代豪掀髯想見氣橫濤鄉間總識衣冠古
流俗空驚論議高前輩似公何可少英雄終老亦云遭
淒涼小雅新堂上曾把文章勗我曹

登墓哭故友西村史先生

都穆

紙灰飛雪滿墳臺知是家人拜掃回交誼忘年吾敢望
東風吹淚濕青苔

西村集卷首

西村集卷一目錄

賦四首

望泮樓賦

結微賦

惜愍賦

甘泉賦

辭二首

桂嶺辭

雲松辭

頌一首

慈竹頌

樂府十一首

褚公廟樂章二首

烏啼曲

敬宗操

圖塋致思四首

冠禮圖三首

歌行三十九首

靈芝歌六首

豐城篇

去婦怨

孀妾詞

靜女篇

一鶴鳥篇

仙人篇

舊巢燕

狐綏綏

山中采菖蒲

廣州督

北風歌

烈風七章

桃莊行

畫馬歌

秦淮歌

澁浦楊將軍歌

觀潮歌

紀遊歌

金臺行

貞女行

殺虎行

鳳求凰

鷓鴣吟三首

雙鳳吟

行臺燕別歌

西村集卷第一

松陵史鑑明古

賦

望泮樓賦

為何中丞作

會稽名邦新昌望邑沃州前陳天姥左翼奕奕學宮多

士斯集猗歟先生世家其側其側伊何夏屋渠渠於寢

之西爰樓以居匠石掄材史皇畫圖因揆地之不足乃

借天之有餘重簷瀉注八窓洞虛外靡飾乎丹雘中惟

藏乎簡書至若風和日美冬溫夏涼天宇朗豁雲容斂

藏先生乃峩爵弁胥葱蘢叶被純衣掄纁裳或登左城

或由右平叶唯意所適徘徊翱翔既徙倚以流睇復招
搖而永望偉宮墻之岌樂囿泮水之汪洋左涵右齋前
疏後闕叶如月之弦如環之玦泓渟淵澹汨隱蕩潏白
虹之來流行青鳥之徵源發忽掀風而觸石舉灑雨而
跳沫叶其旁則有蘭杏棠櫨叶樅桂楠櫛瓊瑤琴榮掩
冉交柯其中則有蘋荇繁蕪芹藻離蓀應風靡靡揜水
田田若夫禮殿東建講堂西抗蔡石崇基疏峯列障憲
星宿而經營法陰陽而背向其為形也瓌譎豐隆其為
勢也睽戾宏壯飛梁搏負而蜿蟺刻楠參差而矯伉丹
青煒煌光彩曄眊蛟龍騰而夭矯禽鳥飛而翾翾靈異

奇怪莫可名狀又若廊廡對剡鬢含類區直如矢棘張
如羽舒循循如接武疊疊如貫珠莫不俎豆茲設詩書
是儲或先賢之所從祀或弟子之所攸居乃有幾儒敷
教髦士窮經爰游爰息允脩允藏或處於室或造於堂
校藝肄業問疑啟蒙叶分刊節度剖析毫芒當春服之
既成時夜漏之未央詠歸兮其行濟濟絃誦兮其聲泮
泮是故月課其成歲獻其良巍科甲第後先相望器之
為瑚璉才之為棟梁任方隅者為岳牧贊政化者為公
卿叶罔不由此宮而出豈不為賢才之大方也哉若其
行告報節春秋筮從日戒羣寮叶命滌為酒宿賓為期

叶至日東方未明辰次於子大夫朝服其袂有袞至於
廟門肅肅戾止博士相之隸此羣士視殺既畢概器斯
已乃馨黍稷亦饗羊豕山物具登澤鮮備有叶血腥上
同乎古初藝孰聿兼乎人鬼遂乃燿火舉牲體升簋簠
饌籩豆陳工祝致告佐食駿奔於是大夫卽位庶士綴
行爵觶具獻燔炙畢從叶馨香苾芬光景輝煌爾乃麾
旛舉升龍翔祝具擊軒縣鳴鐘鼓鐙鎗金石鏗鏘絲竹
繁而不亂匏土劇而不傷迨升歌之一出衆音比而低
昂是皆宣中和而感神人竅幽渺而調陰陽又若華冠
紛羽籥入行八風舞六佾或俯或仰或徐或疾奮袞翩

翩頓趾秩秩泛而不浮沉而不窒張而不縱翕而不抑
氣洽形和神暢志得於是神具醉止祝告利成叶祭之
明日尋繹於祊維道原之不已求神在之無方是知聖
朝之所以尊師重道豈徼一時之福報一世之功也至
若賓興之期蜡通之祀因民聚之時行鄉飲之禮或序
賓維賢或正位以齒欲使民尚德而敬長觀化而興起
於是主人謀賓介誓有司戒且肅敬甚卑拜辱於館拜
至於階叶賓席南向牖南是基兩階之上主阼介西有
降必從有洗必辭主人獻賓薦脯設俎叶齊肺興加啐
酒告旨乃酢乃酬百拜成禮獻介如之遂及衆賓衆賓

之長升者三人坐祭立飲肆席其西叶若夫位於堂下
 亦辯薦而必均猗一人之舉解助主人而樂賢叶有遵
 維公大夫實從公席三重位於賓東大夫再席主北西
 容維升降與獻酬繁介賓之是同乃有樂正先升羣工
 次入歌之三終比以二瑟依特磬以為聲吹笙和而應
 律遂乃間歌雅什合樂風詩嘒大音之猶在美王化之
 始基然後正歌備工告悉主人降司正陟奠觶飲旅酬
 畢徹俎脫屣揖讓就席爵行無算樂奏維欲叶樂湛無
 荒醉止不失及夫禮既成賓辭出陔夏奏牘聲作叶應
 偕鳴雅合節叶主人拜送以明有卒逮夫孟春之月合

射學宮祇用觀德亦以和容飲禮倡其始燕禮衍其終
 其為職也則有賓而無介其為樂也則釋雅而歌風采
 侯旣彰照質攸設特磬徙東其龔捷業叶司射適堂袒
 而遂決有司請射三耦維剡彀弓旣彀羽簇斯棘景如
 星流聲如帛裂叶有旌負侯樹羽幢幢諾聲振乏唱獲
 奏功釋者報算委於鹿中用祈爾爵取飲於豐獻獲於
 侯乃用折俎獲者負侯北面拜受叶初適右介終中亞
 左叶遂當侯以三祭立旣爵而竣後叶維大夫之與公
 士亦拾發而為耦叶揖皆進以當物取乘矢而順羽爾
 乃樂以騶虞應以懸鼓采蘋間之其終咸五越三射之

既周辯受酬而旅語恍若子路執弓序黠揚觶而相與
習於矍相之圃乃知先王之教所以習容儀知賢否
可以文可以武非以之逸時而尚簪也曠千古而難兼
乃一樓而畢觀匪慈母之三遷由擇居之得所於是朝
之縉紳鄉之黃耆咸喟然而稱若出一口曰夫樓觀者
所以廣心目宣鬱滯暢精神覽風氣史不勝書文不勝
記然求如我望洋之飫道醉德漸仁浹義慕聖思賢育
才游藝是殆猶霄壤之殊固不可甲乙而第然而先生
憮然若驚瞿然若悸思其所未能不自以為至也客去
乃援琴而歌之歌曰日月光華兮不遠伊邇其來無終

兮其被亡已再歌曰明明在天兮人皆見之運行有常
兮匪獨我私樂此終我生兮又將何求

結微賦 送吳修撰原博起復

繫青春之獻歲兮和氣周浹而流行白日昭晰於上天
兮微風動物而發生惟美人離此故居兮將騰駕夫遠
道榜餘艘之長舟兮濟江湖之淼淼紛寶從以馳驚兮
咸出祖乎河之梁蒸蕙蘭以為馥兮精瓊瑤以為漿羗
升歌而比竽瑟兮音博衍以疏越獻羽觴而旅酬兮行
徘徊而未發睠回視夫舊鄉兮情鬱悒而內傷念王事
之靡盬兮懲懷與安之敗名 叶忽交手以前行兮曾不

能須臾處也望雲旗之委蛇兮順埃風而輕舉也經中原之千里兮覩邑野之蕭條喟憂心其怵怵兮哀民病之曷瘳叶凌呂梁之洪濤兮指天津以徑度日皇皇而不暇息兮恐年歲之遲暮曼流日以遙睇兮偉皇都之赫戲騰王氣於中天兮儼神明之所居叶且將入覲於六儀兮宿藻板而致齊叶聞鸞聲之將將兮起視夜之何其戴切雲之高冠兮帶長劍之陸離被夜光與明月兮檻椒蘭以充幃當闕門之未啟兮聊假寐以潛媿魂營營而靡適兮豈斯須之忘乎敬忽鷄人之唱曉兮命天閭其啟闢爛煌煌之庭燎兮紛炫燿乎崇班風冷然

而轉爐香兮芳菲菲其滿殿奏中和之韶樂兮風翔鳴於霄漢望重瞳而舞蹈兮折璫枝以爲獻亮君用之不乏斯兮冀少伸其慕戀惟玉署之清華兮在人間而天上備顧問而獻納兮掌絲綸之密命叶蓋將儲將相於禁林兮豈辭藻之爲優邈紫霄而容與兮凌玉清以逍遙叶啟北扉而鄉浴室兮紛名對以無時總史筆之婉微兮發金匱以抽思誕帝心之簡在兮秉化權其有日也沛德音之浹行兮周四海而靡息叶也勒金石而播聲詩兮又何古人之不可及叶也嗟予生之賤且遠兮固幽獨而傷懷叶也苟願言之不孤兮雖槁死山澤其

何悲也亂曰黃鵠一舉翔千里兮其羽可儀洵且美兮
尉羅高張莫我以兮下視鶉鷄栖棘枳兮其鳴咬咬其
飛靡靡兮顧瞻徘徊不知所止兮高下異勢固其所兮
匪不爾慕不可易處兮翩翩獨征無疇與兮庶幾永日
以安所受叶兮

惜愍賦送莫景周赴新昌訓導

秋風蕭條夕起兮白雲變而為霜原野寂寥無色兮草
木為之不芳嗟夫君去國而遠逝兮將往遵夫行路蹇
徘徊而不進兮步十舉其九顧望皇居而不見兮涕浪
浪以霑衣情侘傺而莫釋兮何須臾能忘之繫願忠而

慕義兮冀少伸其微志胡壅遏而不通兮曾不能以一
試彼蕙纒與蘭珮兮宜日切乎君身忽棄捐於山谷兮
豈將惠夫南之人觀江湖之浩浩兮紛日夜而東流駐
駟馬於山臯兮乘船船而下浮去故鄉之日遠兮路險
難而多牾濟錢塘而上稽山兮踞陳辭於神禹慨聖功
之無間兮民日用而至今仰昭回於上天兮儼光華之
照臨入浦江以南徂兮眷新昌之所治俗儉嗇以憂勤
兮乃風氣之所會山崧龍以多雲兮晝冥冥其若雨林
幽邃以行迷兮疑非人之所處虎豹穴處而咆嗥兮猿
狖跳梁而嘯啼溪谷嶄巖而險阻兮草莽委被而萋迷

荀衆芳之不乏君用兮雖僻遠其何悔也羌好修以爲
常兮矢初心之靡改也昔賈誼以才見嫉兮卒遠竄於
長沙柔何切終焉宣室之名對兮語前席而忘罷叶苟其
言之見用兮身不必在乎君側繫貴寵之與賤疏兮諒
由命之所出惟定心而廣志兮寧時俗之能從擣茲媚
以潤身兮豈將愁苦而終窮亂曰鳳凰集於高崗兮世
已見其文章固非時俗之所好兮然共以爲嘉祥托靈
風而上浮兮俾翱翔於帝鄉

甘泉賦

爲吳汝琇作

維皇天之流澤兮降靈津於厚地隨洪纖以成形兮滋

萬物以攸利阨於川而不爲隘兮放於海而不爲泰叶
浮元氣之淋漓兮長如斯而靡竭叶猗高原之汨汨兮
實異名而同類孕湛露之餘潤兮毓圓魄之凝精發脉
於至密兮而演派於無垠挹之斯不虧兮貯之斯不盈
趨濁世之埃滓兮沁沆瀣之華英彼美人之嘉遯兮心
澹泊而無所樂獨於斯之鍾情兮將夙夜以從吾好朝
酌之以自甘兮暮飲之而屬厭彼芻豢之羶腥兮固無
與乎草蕞羌疏食之與太羹兮紛胥是以爲具庶幾曰
周旋兮以永夫終饗餐至和而咽真液兮濯臟腑而澡
精神除粗穢而沃內熱兮思飄飄之上淦乎浮雲眇六

合之密邇兮舉集於吾之目前託餘音於商歌兮儼金石之相宣歌曰泉之涘穹然可以栖吾之宇兮泉之流悠然可以漑吾之圃兮泉之味泊然可以潔吾之茹兮終我生而靡他保兮願見君子而譽處

辭

桂窟辭

桂樹連蜷兮巖之幽有美一人兮於焉逍遙叶履軒巖兮日延佇嗟所思兮在中路蹇何為兮不來恐年歲兮遲暮採芳馨兮遺之遠莫致兮愁予去聲結桂枝兮為房芳菲菲兮滿裳矯厥美兮自媚日欣欣兮樂康

雲松辭

壽詣封禮部楊景芳

長松兮蒼蒼白雲兮英英叶上有女蘿兮下有苓駕飛龍兮行四方蹇夫君兮惟顧懷叶日徜徉兮澹忘歸結松枝兮為蓋攬雲氣兮為衣雲衣飄飄兮儵輕舉仙之人兮紛紛而從女朝蒼梧兮夕縣圃君長生兮樂無苦又重之兮有美子松宜棟梁兮雲宜雨潤乾枯兮庇寒暑

頌

慈竹頌

壽王節婦

維坤德厚竹挺生兮貫歷四時常青青兮中虛外直類

秉志兮色潤而貞不嫵媚兮材爲世用調律呂兮和樂
定時萬事舉兮翠寶羅生鳳斯集兮五色離褻映朝日
兮恒幹亭亭執峻節兮愈老而堅傲霜雪兮抑之不撓
撼不躡兮允矣碩人可比德兮挺立不遷如勁特兮娟
靜潔清其儀不忒兮秉節好修遇變靡易兮其萌天天
耿有光兮爲民之則爛文章兮令名令望日孔昌兮千
百其世未可量兮

樂府

褚公廟樂章

天蒼蒼兮九重神皇皇兮雲中乘飛龍兮翱翔覽宇宙

兮無窮臨睨舊鄉兮顧懷載雲旗兮下來飄風屯兮零
雨慰我民兮夙思民思兮焉極意恍惚兮有奕鼓鐘將
兮和鳴神旣留兮爲民飲食神迎
庭燎有輝兮夜向明雲掩冉兮光晶熒神其醉飽兮欲
旋溘埃風兮上征駕雲車兮駟玉虬聳長劍兮揮公矛
斬夔魑兮屠蚩尤廓妖氛兮無外匪獨賁兮此州神送

烏啼曲

慈烏夜夜啼啼我門前樹今年復明年生兒不飛去返
哺鳴相呼旁人莫驚起兒大還生雛烏兒尾畢逋

敬宗操

并引

敬宗美凌孝子也孝子能愛敬其嫡有加於生可謂知所重矣嗟乎世之人私其所出而薄其嫡者比比而是甚至貴爲大夫士而於贈送之典有亂其分者不知蔑其父而誣其宗廟自陷於非禮聞孝子之風可以媿矣余故假其詞而寓諸音授操纓者弦而歌之庶觀民風者有所擇采焉

少生我兮兒寧不知兒奉嫡兮將尊父爲父爲尊兮宗廟斯敬兒於所生兮豈忍忘之嗚呼天高以尊兮地順以卑兒心孔悲兮知者其誰

圖塋致思四首

并引

林侍御誠莆田人也生十八日喪其父進士公輝七齡喪其祖兵部郎英侍御貴以言忤時相歸日畚上樹木墳成追復用以諸隴之不能朝夕斯也乃繪爲圖詩之以洩其哀思云

寶澗操

兵部初葬穀城山既遷寶澗之西題曰寶澗西原

羣山籠窈孕厥靈兮維石林林粲列星兮水泉交流樹羅生兮匪無穀城可以藏兮不如此之安且臧兮公孫獨賢行四方兮誰捍牧采無毀傷兮瞻望弗及涕泗滂兮

象山操

進士之墓在象峯題曰象峯東麓

瞻彼象峯兮維麓陂陀考昔早亡兮托體其阿兒焚黃
兮親知不知兒樹木兮日益以多嗚呼謂天匪高兮謂
地不那生不父識兮悲其奈何

鳳山操

進士之配封儒人吳氏
葬地也題曰鳳山北隴

高哉鳳凰山下有壽母墳孤兒日種樹歲久皆成林林
成使墳好利爾非兒心一朝受王命舍之登要津慈烏
飛來樹上栖啞啞反哺鳴聲悲爾烏有母伸其私我獨
行役未能歸側身南望涕漣漣

塗嶺操

侍御壽藏題
曰塗嶺南窩

塗嶺崔嵬溪谷逶迤營彼中藏厥土攸宜象峯東委鳳

山北峙去父母居不遠伊邇瑕邱云樂遽瑗請前子高
復事擇不食焉君子之與惟中道處觀於九原吾其歸
汝

冠禮圖

為鄴人
余懷明

大賓初戾止贊者相其儀主人迎入門揖讓共升階叶
鋪筵在東序櫛纒為施笄降升授緇布進容前致辭適
房服立端爵鞞亦從加叶幼志既云棄成德斯慎之孝
友其時格多福由茲基努力永勿替萬壽以為期始加
出房欲何之南面示容體大賓降西階盥卒升正纒皮
弁親執之乃申再加禮爾德苟能慎威儀斯濟濟眉壽

萬斯年受祉茲其始素積既陽陽素鞞還委委服之永
無斃夙夜斯敬止加再

三加禮彌尊欲使諭其志爵弁高峩峩純衣美而裘纁
裳遵古法鞞鞞非新制兄弟咸具來孝友期無替厥德
斯有成禮儀茲既備甘醴受而祭孔嘉昭爾字黃耇與
台背俾爾耆而艾叶天休永保之克昌惟世世加三

歌行

靈芝歌

靈芝生叶粲若英叶來百福世其昌
靈芝生光且奕慶斯鍾象乃德

靈芝生叶銅池中叶和致祥壽無疆

靈芝生氣之粹配慶雲象華蓋叶

靈芝生受天祐祐維何錫爾祚

靈芝生叶何輪困子孫兮宜振振

豐城篇喜汝其
通秋捷

豐城孕靈異古劍淪獄中高牖以為域厚土以為封匪

無用世意守在得其從光芒不可揜精氣化為虹融然

靜夜中上貫牛女宮遂令博物人候望訊奇蹤啟鑿發

溪鋼拂拭去塵蒙肅肅白鷗尾濯濯青芙蓉所遇無堅

物蛟螭莫嬰鋒時時吼匣中恍若鳴雙龍尚方信多珍

神物不世逢行當獻天子持之授元戎時與薄伐師一
掃胡夷空塞徼靖無塵邊民業耕農坐銷冗食衆良由
用劍功

去婦怨

少婦顏如花嫁來十五六辛勤養姑嫜紡績事衣服一
朝顏色衰鏡中非舊時夫婿本輕薄恩愛變成疑大姑
猶似可小姑讒殺我去我不敢啼啼時當及禍回頭告
故夫妾去看妾離寄語後來人善事大小姑

孀妾詞

妾家住鴛湖花容映雪膚深閨不能閉一朝嫁金夫金

夫內寵非一人衆中最愛惟妾身並馬章臺光照路同
舟蘭浦影搖春春光可惜不長久昨日紅顏今白首金
夫一夕夢不醒零落殘粧猶在手雲情雨性難自持畫
眉再受他人綏嬌兒幼女棄若遺望母嗷嗷泣路岐泣
路岐母不來叶行人見之相爲悲地下金夫知不知

靜女篇贈張靖之

靜女姝且好采香谿水邊容顏若華月流光正嬋娟黃
金爲步搖明珠間琅玕霧縠翳方空長袖拂翩翩美目
騰光彩鬢輔宜咲嗚凌波動微步旋轉何便嬛令色天
下稀遂爲君所憐選擇升椒除燕婉侍君前鷄鳴戒盈

朝辭輦願推賢君心重賢淑寵倖冠三千逍遙赤墀畔
游戲青蒲端衆女嫉蛾眉善淫生巧言遂令絕世姿擯
棄不復延寂寞閉長門蹉跎過盛年君門浚九重虎豹
衛嚴闕望幸固已絕求通良獨難彈琴和悲歌淚下空
沈瀾薄命古來有君恩故如天

一鶴鳥篇

鶴生雛在祠宇雄飛爲求食鷓鴣相煦嫗羣雛日云長
離離半生羽客子升屋危攀巢探雛去 鶴亡雛鳴聲
悲飛上復飛下似訴監州知監州民父母仁民常見推
聞聲爲咨詢知是宥子爲立命答宥子送雛還故栖

鶴還雛飛且驚引領復呼羣旋繞監州庭上感監州恩
下全父子情監州有惠政外嚴中則仁遇物且能然臨
民斯盡心誅彼暴惡徒全此蚩蚩氓豈獨鶴還雛洋洋
多頌聲

仙人篇

仙人何翩翩來自芙蓉城蒼龍駕羽蓋白鹿夾雲輶飄
搖紫霞裾旖旎彩霓旌揚言語世人吾道可長生鼎中
養鉛汞火候日抽增龍虎得交媾丹成化黃金叶服之
生羽翼輕舉昇天行歷覽周八極飛行不暫停赤松與
王喬揖手來相迎襄回雲路側翱翔朝太清上帝休北

西村集卷一
五
牖羣仙集南楹楹間兩玉女雲璈襍鸞笙飲爾流霞杯
侑爾步虛聲不生亦不滅倏爾數千齡俯首觀下世塵
霧杳冥冥我聞仙人語太息淚沾纓秦皇與漢武學仙
盡無成輶輳鮑魚腥茂陵松柏青此時仙人在胡不救
其傾仙人言雖好掩耳不能聽

舊巢燕

舊巢燕尾涎涎秋去如別離春來復留戀前年主人賓
客多滿堂笑語沸笙歌百鳥盡入籠中養猶引虞人日
網羅今年主人忽貧賤客散鳥飛門戶變燕兮猶向舊
巢歸依舊年年一相見一相見空復悲此生相守期不

移不學百鳥被人籠養在華屋華屋自來多反覆一朝
食盡別家行往來徒爲人所輕舊巢燕葺爾巢育爾雛
爾雛大來爲我徒翟公門下舊遊客不及爾心終不渝

狐綏綏

并引

中使與妖人相爲表裏毒流海內言之可爲於邑
司馬三原王公奮不顧身抗疏上陳有犯無隱卒
能感悟君心誅戮凶黨以謝天下斯正孟軻氏所
謂一正君而國定者也因托物引喻以頌豐功盛
德之萬一云

狐綏綏鬼爲侶夜嘯叢祠作神語戲舞跳梁從社鼠雲

凝月黑天冥冥尾搖陰火光如炬與妖作孽天不知指
 顧灑灑雷風隨社公土伯望塵拜白望橫行九州界萬
 民皇皇訛且驚市肆晝閉空其城羣巫四出假神命搜
 括逮捕何縱橫巫言神君去天咫尺民命由來主張是神
 今下界來求珍敢有不共隨殛死明月珠夜光璧瑪瑙
 之盤大逾尺婆律旃檀蘇合香珊瑚琅玕亞姑石此物
 何由在山澤巫傳神言許輸直厚估高評動千萬破產
 傾家責難塞黃龍大舶行迷津櫃帛囊金無紀極江南
 真宰哀民窮封章上奏天皇帝教六丁攝狐鼠貫以
 大索囚鐵籠斷狐頭斫狐趾磔鼠之皮肆諸市妖巫殄

滅厲鬼亡四海清寧萬邦喜真宰之功一言耳回格天
 心正人紀

山中采菖蒲壽安晚老仙

山中采菖蒲澤中采雕胡雕胡持作飯菖蒲持作菹問
 君將何為言就仙人居解一仙人居安在震澤東南隅門
 前有長路青松間白榆舍後有清池蓮葉巢神龜叶二解
 高樓臨水起縹緲隣太虛木蘭為軒檻桂樹為門樞黃
 金為寶蓋八角垂流蘇解三仙人山澤癯為樂自愉愉長
 身且高顴紅顏白鬢鬚潛光飲夕氣眺景含朝霞叶四解
 有子兩三人才名皆丈夫朝莫問平安濟濟庭中趨諸

孫八九人溫溫玉不如出門遠行遊所業在詩書經年

一來歸銀鞍照驪駒解五壽星何煌煌照我仙人居賀客

來滿途仙人舊懸弧請客坐堂上布地紅氍毹解六促令

辦中厨品物事事殊山珍間海錯肥羊和笋蒲玉壺湛

清酒金盤鱠鯉魚解七名娼出邯鄲窈窕世絕無頭上翠

琅玕耳懸明月珠紫綺為下裙紅羅為上襦上堂拊琴

瑟下堂吹笙竽清歌按妙舞行雲隨卷舒解八坐中黃眉

翁向前持一栢叶三千一洗髓九千一伐毛叶請看目

瞳子清光果有不叶金石未為固喬松真吾徒崑崙闐

風上與爾長嬉遊叶九

廣州督

廣州督行勿遲苗獠正猖獗攻城及湮池廣民授甲日

登陣將軍呼酒賞花枝廣民析骸還易子將軍停舟看

山水廣州督勿遲遲戕民命尸者誰

北風歌送徐時晦

北風淒厲兮凜盛寒之中人歲忽忽其欲莫兮鳥寂寂

而無聲繫美人之不留兮將問津而徂征傷予心之憂

憂兮滑予魂之營營望前旌而太息兮曾不能從之以

行惟德音之孔昭兮恒佩服於予身苟中心之靡他兮

雖在遠而日親

烈風七章憫吳孝子廷用

烈風無停柯凝霜變青草年命苦相催壽者何其少惜
哉延陵孫無奈祖謝蚤孤兒未能行寡妻年尚小含凄
教詩書灑淚相攜抱矢志期自持有如白日皦
白日出東北暮向西南流誰知貞烈名亦應宮掖求郡
縣苦見迫強命登行舟慟哭與兒訣相見永無由生當
長戚戚死當長悠悠
悠悠復戚戚哀怨無終極有詔屬藩王隨例之封國寂
寞掩長門彷徨思故域邱壠不復知孤兒長在憶夢中
或見之覺後那可得相離三千里安能來母側

母側兒不來叶兒悲無已時升高望母居路遠莫見之
浮雲暗邦國遠樹含悲颺白日忽西昃景在桑榆期顧
瞻起長歎吞聲淚漣漣

漣漣竟何益誓將求四方崎嶇指東廣迢遞轉西江叶
行行異川陸冉冉變溫涼層巒翳雲日巨浸騰蛟龍叶
畏途良險艱十步九徬徨誰謂君門遠萬里終能通叶
陳情叩闕陞昧死干賢王

賢王任孝理下令許迎歸誰知病已革不絕僅如絲籲
天代以身剖股持作糜張目忽能視言動如有知瀕死
得一見驚號更相持哀聲徹天地旁人亦酸悲

酸悲復嗚咽哀哉終隕絕本圖得生還豈料是死別啣
哀理歸樞水舟仍陸轍江湖多風濤谿谷深雨雪間關
幾千里終焉耐先穴山高亦有崩水深亦有竭孰知哀
慕心終天不可滅

桃莊行

桃莊西頭多古墓下有死人常不寤墓前松柏盡爲薪
墓下牛羊時滿路牛羊下上牧豎歌古碑無字空峩峩
棺中白骨縈爛草殉瑤知入豪門多豪門豪門心未已
猶課僮奴日侵毀輦石取泥無厭時古墓爲田新墓起
勸君爲墓當益固願君莫學桃莊墓

畫馬歌

房星之精化爲馬肉驥連錢滿天下世俗寧知驥與騶
善相方臯一何寡君看畫馬自有真能通相法方入神
驪黃牝牡不足辨天機內解斯其人騰驤飲齧逐水草
筆端幻出龍駒島雄姿矯矯長風生逸氣稜稜飛電掃
老眼摩挲忽驚起便欲驅之涉長道君不見曹韓已往
不復生吳興死後無丹青天閑龍媒十萬匹誰能起之
圖爾形

秦淮歌送陳文振

停君金叵羅聽我秦淮歌長江西來幾千里沿回直入

西林集卷一
臺城裏浮青蕩綠南北流至今猶號秦淮水秦淮之水
能容舟秦淮之上花滿樓美人捲簾垂玉鈎太白仙人
清夜遊酒酣乘月往石頭棹歌渡淮水倒披紫綺裘英
風撼五岳豪氣溢九州邇來四千四百九十五甲子無
人繼此移山倒海之風流水光依然月如故斷雲零落
令人愁豈無清歌與美酒與子碌碌誠堪羞我歌秦淮
歌送君秦淮去城西酒樓在何處主人今非舊孫楚且
須痛飲歌達曙達曙歌醉方寢笑壓吳姬股爲枕滿身
糝糊覆宮錦明年我亦泛秦淮手解金龜就君飲

溲浦楊將軍歌

楊將軍才且武作鎮邊城勇貔虎海波瀟灑南風生日
夜登陴按樓櫓揚兵耀武天欲傾驚雷破山震鼙鼓震
聲鼓縣旆旌紀律肅步伍精止如山峙來如風行戰無
前陣攻無堅城倭夷遠竄海道平坐令四野無交兵黎
民久安堵不見寇盜驚楊將軍好士無與倫胡公老去
蕭生死康生羅之爲幕賓倚馬作露布揮戈淨風塵謂
予好奇節論交握手意氣親平生慕魯連輕世肆志不
羞賤與貧射書直欲諭燕將蹈海不肯爲秦臣方今三
邊用師旅我將持書告當宁佐君徂征固吾圉功成不
受茅土封笑指雲山是歸處

觀潮歌

雞聲喔喔天未明
大家盡說觀潮行
騎輿徒步相迨遞
衽服靚粧街市盈
江頭日高潮未生
秋風獵獵笳鼓鳴
美人狎坐臨前楹
嬌歌婉轉調鳴箏
須臾讙呼笑相指
一線遙從海門起
潮頭崛起高於城
萬雷齊轟駭人耳
排山倒海天欲傾
回波激射奇態生
兩陣合戰兵力勅
戈甲晃晃秋空明
羣兒弄水夸巧捷
擊旋蹙踏如浮萍
人言潮來信有時
我言潮來不可期
君不見胡兵營沙
人有待潮乎此時
信何在徒勞日後
來不休萬古莫洗
錢唐羞

紀遊歌別崔望宗丁公耀

憶昔辭家同作客
千里遙遙事行役
姑蘇臺下榜人歌
萬頃湖光浸空碧
慧山隱隱雲欲連
山靈謝客心茫然
吁嗟鴻漸不可作
扣舷空賦招魂篇
延陵祠前春草綠
再拜陳祠獻醞醪
九原焉得使重生
爲振高風轉衰俗
犇牛閭下多飛濤
打鼓發船笑憚勞
樓臺晚映丹陽郭
臥聞笑語聲嗷嘈
南徐山水鍾奇秀
壓酒吳姬遠招袖
崔林寺裡杜鵑花
不見妖紅更如舊
酒酣走上江邊樓
樓名多景還多愁
古來豪傑竟何在
但見江海朝宗流
大江茫茫與天接
三老開頭敢矜捷
長風浩浩自天來

吹落寰瀛秋一葉金山屹立江之中水天浮出青芙蓉
絕頂浮圖絢金碧兩岸往往聞晨鐘中冷之泉冠今古
旋汲還歸鳳團煮碧雲零亂白花浮傾入詩腸浣塵土
維揚自古稱繁華陵遷谷變重咨嗟高駢樓廢今生草
煬帝池荒但聚蛙看花偶入蕃釐觀物態人情幾移換
當年仙種已無存尚有穹碑可尋按二十四橋春水平
紅亭圯毀赤闌傾鳳簫無聲玉人去惟見夜月依然明
海陵蕭索人家少城郭依微望中小五更茅店鷄一聲
露冷烟濃遠山曉崇川乃在海東涯參差雉堞鳴悲笳
海山樓高切霄漢故鄉南望浮雲遮海上潮聲信朝夕

四海無人事禾麥遠浦風多海味鯉沙場雨少鹽花白
狼山巍巍高插天五點螺鬟凝紫烟東風多情野芳發
胭脂滿地遊人眠半山亭外春如酒愛聽啼鶯坐來久
行行更上青嵯峨白石無塵不須帚馬鞍之峯形與同
龜田幻出波濤中溝塹秩秩宛如甲乃知造化非人工
西上坭山幾千丈鐵杖還敲洞門響東看鞭迹劍山頭
俯仰令人動遐想海門水與天河通乾坤上下涵空濛
樓船采藥去不返蓬萊應在虛無中斯遊隨處得奇遇
記遊可惜無佳句林間子規催我回解維更泛南來路
南來喜到鶯湖西湖亭小飲離思迷越女含嬌唱楊柳

羅巾泪濕蛾眉低沙頭酒乾玉壺側黃鸝其奈臨風啼
金臺行送吳進士汝礪之京

送君松陵道遠上黃金臺黃金之臺在幽薊燕山易水
相潑泐燕昭栖栖本弱國郭隗瑣瑣非雄才時移運改
真主出廓增基構崇高哉下瞰中原撫五岳上摩北斗
羅三台維皇建極明堂大開縣爵待士四方風來羨君
前年取高第名掛天曹粲星麗歸寧不見倚門人淚盡
呼天血斯繼三年讀禮心惓惓祥禪相循喪服更素琴
鼓罷笙歌成仰望青天東北征洞庭嫋嫋涼風生秋水
芙蓉滿陂澤日色照耀千花明大扁小艇相逐行雙櫂

夾舷鵝鸕鳴持觴挹酒勸君飲去留各含無限情無限
情長悠悠人生豈爲離別愁丈夫得意有如此仗劍出
門何所求賈生痛哭更流涕憂在國事非身謀君今此
行給史可立致遇事盡言斯職修毋令吾徒戚戚長抱
江湖憂

貞女行送汝其通

貞女昔未字脉脉處浚閨容顏美如玉中門未嘗窺
軋機杼聲朝斯復夕斯所志在女紅辛苦安得辭媒氏
豈不營所適匪其宜衆口徒囂囂矢心終不移冉冉歲
云暮芳馨愈菲菲君子慕高誼寤寐以求之幣交旣成

禮桃天良及時諸娣如雲從百兩送于歸川澤靡韓土
孔樂乃王畿令居且燕譽永久以爲期

殺虎行

城西之山舊無虎草淺林疏少依阻白日咆嗥忽見之
橫行食人難指數官兵捕虎爭負戈上下陵谷交張羅
一虎跳梁悉驚潰何況衆口騰其多怒視眈眈猶負嵎
山民攫之椿以艾黃斑紛披血膏野相與屠戮殘其軀
嗚呼養兵資禦侮見虎何爲怯無武龍沙茫茫天四垂
走馬胡兒猛於虎君不見肉食軒乘將門子遇敵幾人
能致死

鳳求凰送張教諭子還鄉娶親

孤鳳何翩翩四海求其凰誰知無所遇翱翔歸故鄉故
鄉南海上梧桐產高崗醴泉出其下竹實生其旁鳳飛
且栖息五色成文章相從效于飛和鳴爲朝陽音聲何
噦噦恍若調宮商豈惟偕老願瑞世昭文明

鴻鴻吟送余大尹

鴻鴻何雙雙飛來水中央使君入臺去官爲繡衣郎黃
金爲馬鞍青絲爲馬韉馳驅道路上到處生輝光
鴻鴻何雙雙飛來水中渚傾城送使君使君入臺去旁
人盡相羨吾儂泣無語使君挽不留烏啼天欲曙

鷓鴣何雙雙飛來水中洲使君入臺去翩翩天上遊鳳
鳳覽德輝一鳴三千秋下以成文章上以昭皇休

雙鳳吟送吳汝礪汝器兄弟秋闈

翩翩雙彩鳳和鳴復齊飛齊飛何所止西北有高臺叶
高臺高無極上與青雲齊竹實為鳳食梧桐為鳳栖映
日弄光景翥風揚羽儀音聲調律呂文彩耀陸離幸逢
命夔日佐以雲和師箏聲既同音簫韶亦間吹聞聲自
相感應節舞徘徊叶上昭帝王瑞下彰畿甸輝信蒙主
司愛遂命虞人羅叶持為大廷貢張樂迎來茲聞有鳳
鳳閣復有鳳鳳池翔遊永朝夕人間徒爾思

行臺燕別歌

行臺老栢枝相糾羣鳥暮集聲啾啾臺端吏散晚衙畢
相送使君天上遊初筵濟濟月未出滿堂笙鏞間琴瑟
流光遊彩天際來上下通明若朝日金盤玉案相疊高
黃盃白肪凝乳膏眾中持杯捷先得哄堂大笑聲警嘈
興來投壺明月下有行其觴慶多馬宵寒不入玄狐裘
微霜淒淒在鴛瓦分曹探韻題新詩波濤入筆爭雄奇
扶搖擊水海神泣大鵬怒翼雲天垂酒酣樂極成悲譌
譌聲感人哀怨多今夕共樽酒明朝各山河一去與一
留倏忽如飛梭行勞居逸寧不顧我言此理良無他使

西村集卷一
無行者職乃闕使無居者民如何民如何仰公輩廟堂
與江湖到處咸有待從今變理及旬宣總是臺中舊寮
家

九世孫 王聘 校字

西村集卷第一

西村集卷二目錄

五言古六十二首

芙蓉

夜宿吳原博修竹書館時與玉汝別

懷古貽朱堯明 讀楊君謙古樂府

謨無猷邀飲於南虛室讀壁間馮明府詩有感

韜光菴 臨清軒

贈沈啟南 贈汝其通

寄許克大 丙午初度題像

送梅刑部彥常 題梅花道人墓

遊寶石山有懷舊遊諸友

南山道中

送節推華公謫官

春暮霖潦為災賦此以諭同志

賀其榮病京師吳原博昇歸而卒為之殮殯其榮

父作感義詩謝之要予同賦

鍾希哲畫像

遊飛來峯

夜宿虎跑蘭若

落景村

一木

題劉大參所藏蘭圖

丁未歲初度試展余真命酒相對戲為問答二首

送劉德美之京

神樂觀送沈啟南

十八日登含虛閣

遊金粟寺

贈支硎山人

送周元基之京

謝吳鐵峯法酒糟魚

經玉遮山

登鳳岡

聽鶴

送郭訓導

送魯舉人廷瞻廷對

訪沈啟南中道相遇既示斐章且形繪事賦答

蓬壺道人

遺橘吳鐵峯

雲巖書屋

挽吳安晚

慈節吟

讀釣臺集

秋日禱興和程學士克勤韻二首

答沈彥祥賀生孫作

贈王文冕

再疊圖瑩致思四首

謝醫生味芝陳先生

舒嘯亭

三天竺

一愚為沈廷望賦

折楊柳送張子靜歸吳興

贈李中翰貞伯

贈陳玉汝

有懷沈吳二姻家

賦秦伯祠送李舍人

七言古十一首

題沈啟南畫月下杏花

紫陽庵

梅月

秋江客思

送樊司理考滿

澄上人房紫牡丹開觴予以酒因詩以記

送浦汝方訪姚侍御

送康驛丞之京

渡奔牛閘

過呂城壩

題可菴老人寫竹

雜言古六首

秋林會友圖

許子厚約遊石湖余以事沮詩以謝之

題沈啟南西林唱和

萬竹亭賦贈吳汝琇

暮春訪沈啟南道中作

重陽庵

西村集卷第二

五言古

芙蓉

皎皎芙蓉花盈盈出秋水美人蕩舟來容顏宛相似采
之欲為衣離居有君子路遠莫致之引領徒為爾但恐
秋風生零落從此始

夜宿吳原博修竹書館時與玉汝別

歲暮入城郭攬衣獨裴徊叶晚過修竹園主人故所知
所知誼不薄執手言相思復有青雲士遠行從此辭相

松陵史鑑明古

延入中林呼童啟雙扉叶北風何烈烈萬籟鳴參差向
夕燭繼之壺觴相為持初月出雲間殘雪擁寒堦叶獨
鶴失其雌中夜鳴聲悲會面不可常况逢生別離共言
盡今夕鷄鳴各東西叶出處自有時人生安得借叶顧
慙鶉與鷄不隨黃鵠飛叶各各重自愛冀以奉前規

懷古貽朱堯民

晉氏昔奔潰叶中原亂如沸區區廣陵相亦欲盜江介
叶不有顧元公名榮禍亂斯其始去聲既成揮扇功終定繼
牛位盛德百世祀胡為忽云廢古墓逼耕犁荒祠雜妖
厲過者豈無人誰能一留睇遙遙千載間哀哉日陵替

陵替信有由好古無其人請看王侯墓十樹九無存叶

謝公名應芳字子蘭避地士栖栖不遑寧叶時無戡亂才

干戈日相尋叶九原今不作盡然傷我心叶上書告縣

令周舜臣祭掃除淫昏叶碣石永其傳周伯溫撰栽梧表其名

叶同時文章家頌咏費數陳廢興如循環旋復委荆榛

荆榛易永久百歲等須臾守令檢文法長年惟簿書一

為高世談舉俗笑其迂纍纍道路邊誰復賁斯墟朱君

志好古觀此興長吁輯錄匪求名庶幾能者須遺祠幸

見復廢墓未應蕪雖非令式載允為名教圖君其加勉

旃慎毋忘厥初

讀楊君謙古樂府

去古日已遠雅樂久沉淪桑間與濮上靡靡多哀淫

楊君媚學子高志故不羣叶一聞世俗音謂非吾所湛

叶冥心太古初識樂得其真律呂既調協五音和且平

叶咸英與韶護曠世今再聞叶豈惟以自娛擬將獻吾

君奏之郊廟上庶以和神人

謨無猷邀飲於南虛室讀壁間馮明府詩有感

獨客困泥雨閉門愁索居天晴氣微和欲出嗟無輿隣

僧念孤寂招邀過精廬緒風泛林條溜水鳴階渠良友

四五人壺觴聊爾娛陶情匪絲竹冥心遊古初為樂苦

不常奈此年歲徂一適非偶然且復少躊躇興懷舊遊

者由來心迹俱風波一分散判然區域殊精神莫與通

夢寐時交胥願言此浮雲隨風往微軀

韜光庵

韜光古精舍遠迹西山岑岡岫屢回復雲嵐杳浚沉流

泉激修竹綠蘿被青林密葉翳朝陽芳柯承夕陰杖策

遵微徑逝將支遁尋行行未易即遙聞鐘磬音徒倚絕

塵想冥思詣道心攀芳咏招隱松風和悲吟

臨清軒為吳士延賦

達人尚幽勝葺宇臨清流清流宜濯纓深渚可容舟周

百才集卷二五言古

流元不息晝夜恒滔滔叶微風蕩生瀾木葉下驚秋流
響歸空房浮光映高樓芙蓉綠極浦杜若被芳洲於焉
事栖息駕言聊出遊榜舟張水嬉擁楫和長謠叶犀燃
窮恠物蓮折傾龜巢叶鳴更出靈鼉賸予躍文魚叶境
勝良自愜慮淡信無求惟應素心人來此共逍遙叶

贈沈啟南

椅梧生南岳枝葉交相加叶孤生不自異衆木何其多
鳳凰翔中天時來息其柯中郎久不作奈此良材何誰
能為琴瑟奏曲諧雲和遂令清廟器寂寞捐山阿

贈汝其通

江南有淑女婉變美清揚芳馨振微風容華耀朝陽被
服鮮且麗不殊古姬姜蹇修來何遲幽獨處蘭房匪無
室家願夙以禮自防一朝君子求玉帛以時將御車迎
百兩道路宛生光和鳴合琴瑟宴衍吹笙簧顧茲待年
者後處亮無忘

寄許克六

春風布寥廓萬卉咸華滋灼灼滿中園婉綠還抽緋芙
蓉抱幽獨兀兀空江湄誰云發生晚無乃未逢時一朝
秋節至盈盈花滿枝回看艷陽質孰與孤高姿時來即
成就晚達奚足悲

丙午初度題像

時年五十三

自我得爾來忽忽已三載憂樂不相關貧病安能免茲
晨遇初度舉酒一相灑我貌日就衰爾顏常不改過此
復幾時應知愈不逮觀者問為誰曰我咸疑給惟餘舊
親識追想為爾拜茫茫天地間歲月不相待終當委運
去誰亡復誰在謂是無所知言非亦何解一笑兩茫然
浮萍渺滄海

送梅刑部彥常

臨江理舟楫駕言辭故鄉故鄉非不安憂君未能忘握
手一長歎出門何慨慷所遇無險夷行行盡周行老驥

志千里遊子懷四方豈如轅下駒局促徒悲鳴叶聖朝
雖致治庶事未盡康江南多苦雨江北多愆陽遺民日
啼飢已空糟與糠救荒豈無政何能補流亡秋高胡馬
肥徵師守邊疆行者犯鋒鏑居者共餓糧遣使出監護
冠蓋恒相望未聞奏捷功聲勢徒張皇君昔在郎署明
刑凜秋霜仁聲久洋溢遠追于與張茲行定高擢指日
登巖廊願弘濟時具拯斯昏墊民叶莫以合燭故愛此
東壁光丈夫得行道離別何足傷

過梅花道人墓

元吳仲圭嘉善人

問津武塘下攬衣獨吟行徘徊古道旁纍然見孤瑩荆

西村集卷二
五
榛窟狐兔牧豎時來登橡樹半無枝曲池猶未平哀哉
梅花菴一仆不復興空遺水墨踪允爲後世程高風董
巨間不得名丹青古碑亡文章但銘卒與生生前狗名
教豈樂浮屠名將非有深識季世多兵爭愚人信因果
庶幾保其形同時富豪家厚葬俾山陵毀盜殆無餘遺
骸縱復橫珠柙去已久蔓草來相縈何如一抔下晏然
無震驚取重亮在人信非山水靈采芳薦清醕日落風
悲鳴遙遙望遐躅感嘆有餘情

遊寶石山有懷舊遊劉廷美沈啟南繼南兼柬
徐時用仲彥輝諸立夫

山靈謝逋客陰雲故瀰漫叶淫雨日潺潺朝來稍停倦
出門望西湖如見故人面眷茲寶石峯樓臺憶曾館叶
老僧擁破衲松下一笑粲叶興懷舊遊者零落已將半
叶凄然不成歡臨風發長嘆叶主人遠追隨况乃集文
彥共言春將歸與子同飲餞徒倚被層闌逍遙寄華燕
暢心風振衣屬耳泉鳴澗無端霧雨霏須臾益零亂叶
初疑水氣浮復訝山林暗叶佳景能娛人過眼無留盼
一適乃云可得喪非所患叶嗟彼牛山遊胡爲淚如霰
南山道中約劉那彥諸立夫虎跑相會
我行南山中忽忽日將午連岡兀如城盤回抱林隴嵐

氣鬱以深原田何旃旃長松挺人立恠石驚獸怒道旁
何青青幽蘭間芳杜古洞闕烟霞流泉瀉風雨緬懷如
玉人先期在幽阻停車望白雲光儀渺何許

送節推華公謫官

張飲春江湄送此倦遊客冠蓋何營營臨行紛贈策吳
人感恩深攀路隨充斥行藏固由命但爲公論惜梗柸
棄中野蘭蓀槁深澤良時難再遇杳然山海隔黃鳥嚶
其鳴青驪逝安適浮雲忽歸山霖雨不成滴湛湛長江
水粲粲水中石風波汨其泥所遇非故迹惟其有本性
居然自清白勿以窮自卑徽音慰離析

頃以多故絕不作詩春暮霖潦爲災穀未入土
恐有過時之憂聊命紙筆以諭同志云

生生本陽德萬物咸華滋窮陰忽爲咎積雨無晴時顛
風泛洪濤蕩決滄畚菑溝壑有遺民憔悴半流離空林
少烟火晨膳夕無炊縣官急租稅督責煩鞭笞但知赴
期會誰能恤寒飢日月更相送春事奄無遺過時而不
耕秋成安可期雖有勸農令文具亦何爲傳聞盜賊起
民窮多致斯咄喑有深憂豈惟漆室葵

賀其榮病京師吳原博昇歸第中而卒爲之殮

殯其榮父作感義詩謝之要予同賦

翩翩宦遊子抱疾居京師俗習有由來病者栖簷垂一命亮莫延辱哉斯兩兒時攜子夫君數往視念彼形神離昇歸以待盡後事經營之封書告其家殮服飾其尸塗殯就客位受弔居東階叶且為錄行橐以俟歸葬期死者如反生不媿臨訣辭朋友居五倫幾人能弗虧勢利相驅合禍衰隨背馳况乎死生際避遠固其宜有能聞斯舉其類泚乎而題詩頌高誼且以箴吾儕叶

鍾希哲者台州人也妙於傳神成化二十年春

沈君啟南偕余訪之欣然命筆咸云甚似因賦詩記之是歲四月十二日余初度也書於

豫章堂

人生無百年五十又過一去者日以多來者日以偏情慾與寒暑晝夜相剽賊徒行已須杖短髮不任櫛顧茲孱弱軀那為久存物一朝隨化盡形容不復識鍾生妙傳寫為我聊把筆傳染藉丹青經營自胸臆精神與形似毫髮無所失端如鏡中影恍若水底石大均斯賦形其理固莫測孰知毫采功妙奪造化力我聞先正言自治不外飾求真既為妄望久寧非惑君看古人像存者百無十惟能慎厥修庶幾為永則

遊飛來峯

久圖山澤遊苦爲風雨欵驚雷破重陰及晨光已顯透
迤入幽溪厲揭度清淺靈山傳飛來合澗互回轉蘿垂
手可捫松高蓋惟偃陽厓丹霞凝陰洞蒼雪滿秀色如
可攬絕巘竟誰棧衆竅因風號羣芳遲春衍追念平生
歡歷歷猶在眼匪無新相知已少舊遊伴老僧久見招
相攜集閒館解衣任盤礴覽物適蕭散形忘慮則消情
至心莫展寄言同懷人對酒歌勿緩

夜宿虎跑蘭若

我昔遊虎跑旋歸一何蚤奄忽逾十年尋常掛懷抱題
詩寄尊宿平生緣未了

予前歲曾寄詩僧敬祖規有翠
濤軒上重遊約此是平生未了

緣之茲遊非偶然歷境極深窈山靈喜客至隨方故呈
句
巧鐘梵鳴雲間樓臺出林杪涓涓石中泉天遣潤枯槁
淪茗味更佳煩勞頓如掃載咏坡仙詩翛然出塵表夕
陽下高樹暝色栖芳草攜被臥重巖山空寂以悄神清
不能寐轉輾達昏曉晨光忽熹微啁晰聞啼鳥攬衣出
烟蘿從人問周道

落景村

爲沈啟
南賦

羲和駕驟驥杳杳經天衢向夕迫崦嵫弭節少躊躇餘
光爛未收冉冉下桑榆歸雲栖遠岫暝烟生廢墟野雉
雉中林牛羊下城隅回風忽復來灌木吹笙竽野老耦

耕倦盥濯歸茅廬曳杖數雞豚引水灌畦蔬達人尚真
意寫圖聊自娛天機宛流動匪為形似拘

一木

為李思式賦

木以棄而壽人以晦自全君看櫟與樗蔽牛非偶然乃
知為世用孰若全天年覽物有深感悠悠復何言

題劉大參

名欽謨

所藏蘭圖

圖上逐段摘書離騷句

秋蘭何青青羅生湘水旁芳馨隨風發菲菲久彌章嗟
哉好修士采蘋紉為纓人多貴蕭艾謂斯為不芳草木
猶未得理美奚能當若人寫毫素鑒之宜不忘靈修苟
見察萎絕亦何傷毋為翫形似無實徒空長浩歌離騷

經余襟涕浪浪

余自病目間居寡歡丁未歲初度試展余真命
酒相對嗟歲月之不留悼面目之非舊因戲
為問答以自釋焉

形體本天賦全生無少缺去冬嬰禍罹一膏肆微孽藥
石豈不良終焉左其昧譬彼陽光微有星俄爾字子雖
我寓形自來相附結如何視得喪曾不致悲說將非坐
斯累乃與子垂別愬然如無情默爾斯結舌子應徇世
情盛衰因改節有情與無情畢竟同歸滅慷慨奏清謠
輕雲蔽明月

真問

我生非孕育因君試經營形神日相向如影長隨身君
惟昧調燮氣滯斯疾臻胡為不自省乃獨尤我云我不
與君厚舉世誰復親改節或他人匪為我與君我雖具
形似生而無性情休戚殊不知是非安得言病目固為
患未足傷君生勵志苟不衰存賢沒稱神廢視傳春秋
聖門名素臣視日能不瞬亡宋實斯人乃知善與惡豈
由盲不盲君其務自勗我亦同令名

真答

送劉德美之京

風吹大河水晝夜無停流嗟君萬里行且復須臾留王
命自有程安能顧朋儔執手兩茫茫日暮登行舟皇家

重賢才一藝咸見收况茲衛生功妙與元化侔譬彼照
乘珠所往無不售叶願言進明德流光被中州

神樂觀送沈啟南

暮春和氣暢冠紳集城隅振策闖奇蹤流目盼靈區園
邱鬱中天皇矣神明居飛宇入浮雲光景曄朝霞叶交
龍麗瑤砌擊獸緣金鋪川梁駕流虹靈泉激深渠嘉樹
夾道生芳柯綴丹敷奏風何泠然鈞天張清都娛戲易
永日列筵湛清醕宣和賴聲樂間以嘯且歌叶彼美邱
園客逝將賦歸歎羈縈怨遲暮臨風發長吁

十八日登含虛閣

西村集卷二
圓景光漸闕海溢秋生潮禪林敞高閣勢欲凌雲霄老
僧敬遠客良夜相招要焚香足清供舉酒聊逍遙河漢
西南流微風忽刁調夜氣悄且清川原何寂寥悠然動
遐想凭闌發長謠商聲出金石餘音一何嘹願隨瑤臺
鶴高舉棄飄飄

遊金粟寺

在激浦西北

我行爲尋山言至東海隅連峯盡成童黃茆彌所如於
焉載瞻矚盎然風氣殊杖策試探討聿來金粟居山形
旣環合土壤還膏腴澗水絃鳴琴松風簧亂竽蒼龍與
青鳳聯翩戲庭除好鳥鳴高枝嚶嚶如有須老僧聞足

音延客入精廬名香手自焚茗供與之俱言論卽契合
不異相煦濡向夕猶未歸欲別更踟躕茲遊幸一適如
此良非虛浩歌下山去人生電影如

贈支硎山人

幽人戀墳墓構此山澤居層巒代屏障積石當階除飛
泉漱瓊瑤靈籟鳴笙竽清音度回風頽響栖芳株入耳
盡成曲喈喈良不殊臨軒睇冥鴻坐石見游魚飛潛各
有適悠然忘所如緬懷放鶴人不得同交娛商歌滿天
地如與金石俱富貴非吾欲逍遙真有餘

送周元基之京

孟冬寒氣肅鴻雁飛南翔嗟我同心人翩翩翻北行叶
朔風捲征旆轅馬忽悲鳴叶僕夫在門前親賓張道旁
心知生別離取醉暫相忘君昔負奇志少年懷四方迫
促未得施所業但文章茲行騁良圖騏驥超康莊行道
在濟時豈惟名譽揚野人幸東壁冀願承餘光

謝吳鐵峯法酒糟魚

秋水滿陂澤高榆蔭村墟閉戶動經旬未能忘索居足
音何蹇然忽枉故人書欵曲念睽違况有庭實俱法醞
出上尊海魚離糟邱叶香味良夔然夔與常調殊懷惠
欲報之顧無瓊與琚惟於引觴際頗覺愁思祛分甘餉

吾兒俾知君意劬努力苟能珮免爲人所尤叶

經玉遮山

夜宿光福里晨行玉遮山玉遮何深秀岡岫相回環古
來賢達人纍纍塚其間碑文半磨滅松栢多摧攀子孫
不復來存亡非所關感此成獨立臨風涕潺湲

登鳳岡

睽茲鄧尉山盡日窮吟行叶晚登鳳岡頂四顧何蒼蒼
羣山如列城峯嶺互低昂杳杳西日下澄湖浮練光野
鳥相和鳴涼風吹我裳梵宇禩民居樓閣鬱相望聞有
賞心人疇昔此徜徉况當梅花時玉雪被連岡題詩動

幽興寫畫存遊蹤叶去後訂重來中爲事所更叶乃知
百年內爲樂安能常與懷發孤咏浮雲共悠揚

聽鶴

明月出滄海流光照中庭翩翩青田姿深夜時長鳴一
聲聞於天露白涼風生鏗鏘激金奏悠揚協鸞笙達人
厭絲竹隱几冥心聽高低盡成律入耳通心靈沉吟不
知味恍若聞韶韻但恐衆仙至驅之遊太清

送郭訓導

仲秋百卉腓旅雁思南翮涼風吹客衣嗟君事行役三
調不徙官依然在儒籍皇朝重文教此任故精擇諸生

得造就疑義資剖析入室與升堂煌煌盡圭璧冷熱固
人情於君自無斃浩歌菁莪篇芳塵滿瑤席

送魯舉人廷瞻廷對

秋風動地起原野忽蕭條之子遠行遊心旌自搖搖中
夜視明星鳴雞正嚶嚶晨興戒徒御四牡一何驕傾城
此送別張席俯西郊杳杳卽長路依依謝故交故交從
此別執手未能發向夕起重雲白日光明滅維茲大廷
對盡言斯效節效節自吾分過此非所缺不聞劉去華
沒世名愈烈努力景前修徽音慰薄劣

訪沈啟南中道相遇旣示斐章且形繪事賦答

病起言出遊行入吳苑懷我同心人去此苦不遠安
能待折麻始爲情可展榜舟泝川流疾進猶言緩天寒
鴻雁哀水落灣碕淺顧望念何深獨行畏日晚日晚將
何之風悲雨淒淒君子枉前途引領見容儀精神亮相
契遇此如有期何必造門屏然後盡中懷叶君行當入
城余亦從此歸方舟且容與未忍言別離別離悵悠悠
於焉聊寫憂暝投蘭若中宴衍敘綢繆起坐臨前除彈
琴和清謠叶重陰翳明月寒風振山邱慷慨令心悲欲
罷不能休沉吟出門去鷄鳴忽嚶嚶叶

蓬壺道人

登高望瀛海弱水何茫茫巨鰲戴三山屹立水中央金
銀爲宮闕玉樹森成行微風振其柯冷然奏琳琅中有
遺世士餐霞仍嗽陽飛龍爲我駕瓊糜爲我糧容顏若
嬰孩不老凋三光悲哉世間人年命如朝霜

遺橘吳鐵峯

中園有佳橘結實何纍纍經霜不盡采時爲窮歲資念
此難獨有一朝遺所思所思亮不乏聊用致我懷叶

雲巖書屋

幽人厭城市言就雲窟居窟居杳且深所藏惟簡書五
車未爲富萬卷良有餘白雲出巖間俄來集窻虛風吹

西村集卷二
去復來似爲君子娛於焉日容與庶幾名實俱

挽吳安晚

卽鐵峯

徂謝易永久奄忽移陰陽泣卜告門東日月得其良祖
載出中庭送子歸山崗愁雲結重陰白日黯無光前旌
御廣柳丹旄隨風翔徒御皆涕零素驥亦悲鳴叶行行
適幽宅稅駕斯焉藏明器雜前陳苞笥瘞柩旁顧視但
漫漫長夜永無明叶骨月行當化魂氣杳飛揚慟哭不
復聞祭奠安能嘗送者各自歸誰爲少徬徨狐兔如有
情時來戲玄堂千秋萬古後猶悲思故鄉

慈節吟

薄命嬰禍罹良人忽摧夭哀哉襁中兒呱呱泣昏曉殉
死非所難奈此孤而藐宗祊與族姓所繫良不小忍死
少須臾辛勤撫而保盛年謝膏澤潛身處溪窈近市媿
軻親延賓慕陶媪兒成奉祠祀春秋薦蘋藻身爲朱氏
婦庶幾以終老榮名靡所圖節義乃常道

讀釣臺集

子陵遯世士因亂在齊邦羊裘物色中三徵往帝鄉傲
睨帝王尊唾視名利場辭榮良足欽適用非所長觀其
臥床對豈不由衷腸願從巢父流接跡潁水陽詔許放
還山於焉漁且耕君臣義交盡故舊情靡忘希文守茲

郡披榛弔頽荒飾詞薦蘋藻伐石銘文章節禮兩言立
日月可爭光如規莫加圓如矩莫加方後賢務新奇論
議太低昂遂令禮賢舉造化聚訟端叶唯陵固漢人清
節起東京叶况之三代士斯言殊未當逝者如有聞應
亦以爲平叶遙遙望雲山永言多慨慷

秋日禠興和程學士克勤韻

瀟瀟澗下水蕭蕭竹間風愛此幽且浚葺宇當其中既
無紛囂雜且有靜省功吾道在方策雋永將無窮至理
苟冥會萬象咸昭融悠然起遐思忘彼南山崇

其二

率溪有精舍是爲咸買居所惡乃聲利所好在詩書閉
關謝往來長年味道腴衣食常不給舉世笑爲愚孰知
南山翁懷此久踟躕魚鳥雖可樂獨行無與俱惟應浴
沂者庶幾爲我娛

答沈彥祥賀生孫作

生兒免無後未別爲賢愚日夜望成人粗令業詩書兒
今復有子頭角宛相如得孫固云喜無乃添吾憂叶痴
兒不好學枵然腹空虛未知爲人子徒令尊自居故人
繆相愛遺我瓊琚詞叶上言由先德下言攜掌珠何時
得良晤看此庭中趨

贈王文冕

少懷四方志乘時遠遊嬉西經宜與市落魄無人知夫
君何自喜枉駕與之歸華燈坐良夜高論露中懷古今
無窮變壘壘解人頤雷驚蟄斯啟鐘鳴霜乃飛相知苦
不久旋復成乖離出門卽長路驅車獨栖栖浮雲蔽關
山洪流帶邦畿可望不可親悠悠勞我思秋蘭抱幽香
寒松挺孤枝芳華信能保應無遲暮悲

再疊圖瑩致思四首

遙遙天馬山羣行出城外

叶

澗水東南流永黍資灌溉

叶

地幽抱神界穴秘聚生氣繡衣念厥祖營爲卜遷計

謂彼穀城藏於中猶有悔茲焉事改作辛勤閱年歲種
樹皆十圍畚土非一簣魂氣無不之體魄永攸利夏官
如有知含笑於下地載誦思亭章令人發潑慨叶寶澗西原
茫茫天地間壽者何其少哀哉象峯麓孤墳埋百草下
有潛寐人長夜無時曉當其蓋棺日孤兒未離襁抱道
竟不施策名空太蚤郡守解憐才於焉卜其兆穿中旣
深錮營旁亦高燥兒今立要津英名流四表褒封賁泉
壤奎章挾天藻夫君身後名有如白日皦象峯東麓
莆中地濱海羣山多象形眷茲鳳凰山名之斯稱情盤
迴若飛舞時止疑栖停五隴相起伏形勝由天成林侯

卜其吉為母開佳城樹檟匪求材礪石斯為銘五患既盡除一抔期永寧雨濡與霜降春履仍秋行感此狐兔

迹况聞風木聲凄然淚承睫寒泉亦悲鳴

鳳山北隴

死生晝夜理在人皆善言及乎處其際變色不能前

徬徨顧妻子事事成悲憐請看塗嶺穴中有長生天上書

論國憂志欲除其姦天人與順逆大義何昭然玉工昧

其理反為和氏愆營茲以待終將歸要領全聖皇重直

諫再命居臺端直氣不可回風節故桓桓容悅亮非歡

忠義素所安豈如莊列輩响响談神仙

塗嶺南窩

介子永齡邁厲頻死味芝陳先生實生之用求

姻家沈君啟南寫圖復系之以詩聊報萬

云

愛子本天性少者亦何浚念茲成童年苦為瘡所侵寒

熱日交戰孱弱詎能禁人云鬼之為毋乃陰陽滯先生

希聖流用推仁者心一投去其苦再服保其真寢食如

平時奇功妙入神老南寫斯圖為是平生親種杏固寓

言况此及物仁圖亦有時既言亦有時泯

叶惟應受賜

者身存恩亦存

舒嘯亭為東林山陳氏賦

淵明一代士所懷在本朝棄官歸去來舒嘯登東臯將

西村集卷二
為憤懣溼豈以音節超亦有逸羣人葺宇此逍遙發口
忽成音逸響一何嘹長風集萬里游雲薄九霄幽浚比
琴瑟清澈超竽簫絳駒喪其精王豹亡其謠眷茲自然
妙何須鍾律調遙遙蘇門山至人當見招

三天竺

浮屠善幻化利益誇羣愚未能空諸有亦復崇其居巍
巍金銀宮湧出空山隅興廢固由人無乃法所驅眷茲
天竺名古來夷夏殊移之被此地欲表神靈區地勢既
形勝人情亦奔趨我來適閒曠二三同志俱登頓雖云
勞逍遙還足娛仰睇羣峯秀俯循流水迂微風動靈籟

滿耳聆笙竽徘徊將日暮浩然賦歸與

一愚為沈廷望賦

人以智自衒子以愚自矜愚智盡天賦有無何重輕紛
紛效愚者卒獲詐以名外飾中或殊居然汨其真子能
慎自踐斯名方稱情俞也不可及回也言如之險艱致
其力退省發其私愚於此何有聖言當不欺

折楊柳送張子靜歸吳興

下馬折楊柳春淺條未長東風吹落日行人歸故鄉朝
發闐門道暮宿碧瀾堂仰看天上月千里共流光

贈李中翰貞伯

層城多甲第朱門赫戟戟曲水起飛橋樓觀相陂陀何
人拊瑤瑟獨坐當中阿朱絃激清商慷慨和悲歌回風
振叢薄游魚躍靈波大雅久不聞舉世尚滯哇知音旣
云少笑者亦已多沉吟下階陞感嘆將如何

贈陳玉汝

少婦婉清揚當戶織玄黃朝朝弄機杼擘擘成文章筐
篚遠貢之裁爲君衣裳衣裳近玉體衣被自生光苟非
尺寸益焉能置君旁

有懷沈啟南吳廷暉二姻家

日落照高樹枝葉何輪囷上有嚶嚶鳥鳴聲如索羣與

君別離久邈若參與辰結交非不多何如兒女親河水
盡日流浮雲盡日行行雲與流水不及思君情

賦秦伯祠送李舍人

行行閭門道清廟臨通津借問此何居至德垂鴻名

疇茲商周際天命固難諶叶避狄始寧居翦商志將萌

叶聖孫天所啟周道方日新夫君見其微遠竄來蠻荆

叶冠冕化文身禮義開吳民讓國非求名此意難具陳

顧惟君臣誼况乃父子親向無宣尼言誰能識其心叶

李膺吳中彥懷古意何深叶行當侍帷幄揚芳播清塵

七言古

題沈啟南畫月下杏花

我昔慶雲看杏花春雲壓樹埋晴霞無端風雨中夜作
狼藉滿地同泥沙十年踏踏不復見無乃天意於吾賒
老南忽往花正好兩株繁華對晴昊白日苦短看不足
更向良宵事幽討月明照花花在地恍若清波漾文藻
夜深露下花更佳汗濕蛾眉淡於掃巫山神女朝夢雲
洛水靈妃夜當道知君好事不可當遶樹行吟被花惱
詩成得意難具陳片紙再與花傳神品高意遠迹逾妙
反覺樹上花非真須臾喧傳動城郭借看累月紛蹄輪
君不見虎頭曾圖瓦棺壁觀此雜沓輸其珍老僧老僧

收拾去且莫出示無錢人

紫陽庵

玉光薰天天帝怒勅遣天丁劈雷斧電掃霆驅葬海中
散落南山把山補龍血淋漓凝紫瑤玉枝瑤草交瑩英
桂影蘭香泣秋色仙妾坐花吹玉笙千年老鶴噤不語
蕭颯蛾眉怨神嫗有丁野雀遺蛻其妻亦出家於此東望蓬萊一水間
黃塵霏霏正如雨

梅月

老兔爬天團玉生山河影動參星橫弄妻潛奔姑射笑
霜氣作華凝珮纓瘦影寒香塞天地茅店村醪冷無味

翠禽忽聽啼一聲凍雲零落東方明

秋江客思

洞庭嫋嫋涼風起木葉驚飛下江水江水悠悠烟景微
江頭有客未成歸身經北渚雲山杳家住南京音信稀
乍見霜前飛塞雁還聞月下搗寒衣寒衣作就家家寄
可是儂家遠難致男兒出門不返顧直欲浪遊天盡地
輕舟短棹恣經過水遠山長風浪多花艷驚郎大隄女
聲諧流徵郢城歌歌聲入雲花滿堂夜夜朝朝樂未央
勸君莫上瞿塘去兩岸猿啼能斷腸

送樊司理考滿

東方日出城門開雨灑道路無塵埃傾城出送使君去
前車後車相逐來路旁弱柳不堪折祗把新詩贈離別
使君巖巖廊廟姿三尺由來能自持平反不待慈母問
考課行對尚書期最君治行當第一一蹴登臺不爲疾
君不見漢朝任人尚法律獄吏往往爲公卿釋之世謂
寃民少定國人稱用法平况君明經取高第比擬不能
無重輕更將古義決疑獄莫謂明時無董生

澄上人房紫牡丹開觴予以酒因詩以記

入春風雨長交作水波遶舍如潮灤桃李沾泥海棠謝
負却人家看花約追呼聞欲檢民數愁疾強扶來縣郭

市中湫隘不可居却向禪林借高閣忽驚妖艷破寂寞
况乃駢花與重萼芳心暈露金粟敷嬌態迎風紫綃薄
初疑僧伽演妙義天女來聽鬘瓔珞又如洞庭張廣樂
仙姝聯翩揚戍削傳聞此種出羅山未必分根盡河洛
姚家荒蕪魏家廢總有華容亦非昨品題何須較優劣
但得相娛不爲惡老夫睹此喜欲狂遶花吟行不停脚
只愁兩日損顏色好事誰能致油幕又無仙家漆姑汁
可使濃華不凋落老僧破戒爲儂喜斗酒沾來對花酌
掃除熱惱得清涼攪就醍醐出酥酪人生真賞貴適意
不在歌鐘始云樂夜浚秉燭更相照春城月暗鳴宵柝

送浦汝方訪姚侍御

君家寫山樓上住浦樓名掃盡雲山人毫素扁舟六月泝
吳江欲向丹邱最浚處丹邱主者繡衣人年來畫筆如
有神遠慕荆關探妙訣旁尋吳盛接芳隣與君舊日相
知久握手無言驚白首怒呼銀鹿掃庭花笑倩瓊姬獻
杯酒酒酣鬪畫爲歡娛峯巒歛來當座隅摩挲老眼識
真趣脫帽席地驚相呼我欲從君往盤礴無奈塵紛苦
纏縛臨江送君君不留離情直與江東流

送康驛丞之京

皇天不雨江欲枯有客掉鞅遊南都南都煌煌在天上

西村集卷二
四
虎踞龍蟠屹相向城中美酒斗十千臨行請君沽百錢
鳳凰臺頭弄明月拍手醉唱名都篇

渡奔牛閘

下河水低上河漫春雷吼閘奔流悍鼓聲瑟瑟催發船
百丈牽連若魚貫船頭水湧沉且浮順風張帆那可留
行人來往日南北惟有水聲千古流

過呂城壩

河水湯湯向東注壘土橫河障波住往來舟楫恒苦停
首尾相銜纔得渡車聲鱗鱗縷痕急船頭向天如欲立
龍門一躍直下來灘聲雷吼鮫人泣

題可菴老人寫竹

國初寫竹王舍人筆端生動妙入神風流太常繼其後
片紙一出人爭取可菴老人得此傳聲價在人尤赫然
江南賢豪動百數家家屏障生風煙前年寄我雪竹圖
天地慘淡雲模糊大枝橫斜小枝亞金鞭擊折青珊瑚
今年寫竹吳江見寫出千人萬人羨鸞鳳盤空雲日翻
蛟龍出海風雷變鷓鴣無聲錦瑟稀湘娥披雲未遮面
老人老人勿自珍筆力轉多方絕倫高山流水志有在
莫謂識面無其人

雜言古

秋林會友圖

青山寵從凝紫霞飛泉如虹飲渥洼楓林接葉紅於花
上有鸞鶴下麝麝玉樓珠箔仙人家仙人顏色常美好
瑤池桃花得春蚤門前石楠秋葉香滿地綠雲風不掃
有客來遠方驅車涉羊腸車聲到門止揖讓升高堂高
堂奕奕凌雲漢瑤爵金盤青玉案華燈煌煌照宴嬉漢
女爲生洛妃旦浮雲不行天欲伍回風動地飛花亂悲
歡離合樂未央起視明星夜將半夜將半舞且歌發激
楚秦陽和巧笑兩頰生微渦蛾眉曼睩光騰波平生樂
事良蹉跎對此轉覺哀情多明朝忽驚雙鬢皤其奈流

光如箭何

許子厚約遊石湖余以事沮詩以謝之

杭州擅西湖烟花瀰漫天下無石湖在吳苑佳麗亦足
雄吾蘇青山寵從抱湖淚吳臺越城兩荒址紫薇舍人
天上歸乞得天書賁湖水湖水東西流世人相續遊古
人不可見今人來不休古人今人日更改湖上青山鎮
長在梵宇琳宮幾廢興湖波依舊東流海許君約客爲
春遊繡被錦帆青翰舟攀巖踐穴肆探討滄澗擊汰相
夷猷山嵐湖淥可手掬大笑拂入杯中浮舉杯仰天作
鯨吸沃漑胃腎資冥搜時時得句輒嘔出錦囊錯落驪

珠投暮歸列炬照湖上水波湧沸魚龍洄蹇余汲汲塵
中走與約誰知此言負想像清歡寤寐間側身西望長
搔首作詩聊寓不平鳴有命重遊尚須後

題沈啟南西林唱和

故人訪我來長洲半道却入西林遊西林蕭蕭倚絕壁
仰見白日西南流林僧晝眠開北牖驚呼謂是吾師友
遣人四出招良朋露坐中庭接杯酒東方月出星滿天
抗袞起舞心茫然白璧無由報知己丹砂不復延流年
延流年真浪語何如飲美酒沉酣不知暑曇花菲香充
佛廬燭火流光駭仙鼠既歌且謠其樂陶陶不有君子

那能逍遙詩成寫圖徐隱几頃刻雲烟生滿紙天機到
處人莫知明日喧傳動城市

萬竹亭賦贈吳汝琇

我家竹林在平地土淺叢踈葉顛悴君家萬竹連高崗
儷美瀟湘與清渭崖光谷色相吐吞石澗潺湲潏復奔
鷓鴣啼秋白日暝蛟龍捲雨翻滄溟紅泥亭子開中央
朱闌碧甃周爲防孔屏翠帳齊騰光秋蘭羅生瑤徑旁
光風泛轉菲菲香翠陰滿地凝不散綠水蕩漾雲茫茫
美人挾瑟調清商朱絃高張分雁行一彈再鼓發浩倡
清聲入雲哀怨長鳳凰翱翔下寥廓帝子不見山蒼蒼

我爲萬竹歌歌長唾壺缺平生不飲今醉之醉後不禁
雙耳熱夜深起舞月明中猛虎一聲山石裂

暮春訪沈啟南道中作

姑蘇城中桃李花風吹雨批成泥沙離羣客子正無賴
對此不飲空咨嗟美人別來應瘦生思之忽泛婁江行
芳洲杜若何青青林隔岸啼春鶯春鶯嚶嚶求友聲
人之聽之無限情無限情在今夕疑義奇文賞還析大
勝山陰興盡回道路空留往來迹

重陽庵

道家謂王重陽修煉之所

我遊重陽庵不見重陽子丹成飄然與世辭騎龍遨遊

太清裏三山等鰲簪四海猶杯水萬里一瞬間千年片
時耳後人作屋青山頭重陽不來人自遊長風蕭蕭日
杲杲醉臥白石臨清流青衣洞深且幽銜花野鹿鳴呦
呦仰招浮雲喚白鶴吾將與爾仍丹邱

西村集卷第二

十世孫 一 夔 校字

